

四庫全書

集部

欽定四庫全書

集部

莊簡集卷一至三

詳校官庶吉士臣翁樹培

侍讀臣孫球覆勘

膳錄監生臣任溥

膳錄監生臣吳殿英

欽定四庫全書

集部四

提要

莊簡集十八卷

別集類三 宋

臣等謹案莊簡集十八卷宋李光撰光有周易詳說已著錄其集目載於紹興正論者四十卷載於宋史藝文志者前後集三十卷載於焦竑國史經籍志二十六卷錯互不合錢溥秘閣書目葉盛菴竹堂書目俱載有莊簡

集八冊是明初尚存其後散佚原目多寡遂無可考證今從永樂大典中掇採編次共得詩四百二十五首詞十三首雜文二百六十五首釐為十八卷考王明清揮麈餘話稱蔡京既敗攻擊者不遺餘力光獨無劾章坐貶謝表云當垂涕止彎弓之射人以為狂然臨危多下石之人臣則不敢而集中無此一篇又趙甦之遺史載光在儋耳嘗賦東坡六無

詩今止有食無肉居無屋二詩餘四題亦尋
檢不獲是佳篇之遺落者已多然即就其現
存者觀之波瀾意度亦約畧可觀考光本傳
光值國步阨危之時忠憤激發所措置悉有
成緒又以爭論和議為權相所排垂老投荒
其節概凜然宜不可犯而其詩乃志諧音雅
婉麗多姿大抵多托興深長不獨張溟雲谷
雜記所舉雙鴈一詩道中贈樞密使臣一詩

為清絕可愛至所上奏議如論守禦大計勸
車駕親征戒約煩苛裁減營繕諸劄子尤剴
切指陳有裨國是論梁師成燕瑛等疏疾惡
如風俱可想見其丰采迨過嶺以後與胡銓
往還簡札甚夥乃皆醇實和平絕無幽憂牢
落之意其所養抑又可知矣名臣著述幸而
獲存雖殘章賸句固當以鴻寶視之也乾隆

四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

莊簡集卷一

宋 李光 撰

五言古詩

讀書

低頭對千載把卷竟長日興亡見俯仰忠佞更得意
合心自知感慨屢沾臆朱黃紛几硯絃素互編帙比隣
亦好事揆策到蓬葦縱談及義皇坐待寒月出

贈李願老

弘毅年少時學易一念酷研精覃思苦見理不見欲一朝感蒼蒼床下產神竹弘毅益自信夜寐目不屬族長閔其勞令人付斤劖惜哉凌雲姿一斷不復續弘毅少安枕旦氣幾為枯時匠司剪伐壽命旋見蹙神明信可畏感應亦何速至今旁舍笋不生弘毅屋康成書帶草千載登史錄吾書此段奇後學宜三復弘毅勉歲寒任道照猗綠

夜起對月

西風掃浮雲素月清夜滿幽人愁不寐一夕幾輟轉天
河見澄霽江流俯清淺身隨栖鳥息興與孤雲遠叩門
復何人隔竹空吠犬竟須掩關眠爐薰裊香篆

縣齋清坐有懷

門外無俗軌相對惟獨鶴短翮雖未全志已翔寥廓軒
然避雞羣不受鷹隼搏持以比佳士潔白誠相若筆端
生雲烟胸中貯丘壑憐君青雲姿胡為滯蓮幕英豪出
草萊闔茸履臺閣新詩時有寄妙語洗煩灼種學求根

源意匠無斧鑿自慙非清流訟牒困酬酢好古雖膽大
去惡愧力弱君來破吾顏商榷盡流畧高軒掛琴劍景
物如宿約遥山倚青冥遠水帶城郭圓荷已浮花晚筍
亦脫籜涓涓風露清湛湛河漢落濁醪有妙理與子隨
意酌萬事付儻來何必問日脚

學道未忘名欲跨揚州鶴淵明賦歸來頗恨未恢廓平
生剛褊性敢避窮獸搏君詩如清琴平淡猶賀若冷然山
水音妙響振林壑寧為太史走宣事桓溫幕樂哉吳望

游微涼生殿閣況茲積雨後枕簟謝焚灼未能去三彭
便可休六鑿跌宕文字間詩酒自相酢氣凌李杜豪力
振曹劉弱偏師攻長城稍稍出方畧山川助離騷景象
如宿約陰風起虛籟暮靄昏城郭萑萑泛金塘簣管墮
銀籀卧看曉參橫坐待殘月落不愁衣典盡尊空莫起
酌明朝醉復醒生憂押垂脚

雪中過盤石山寄劉季山

離家六十日晴嵐逐征鞍已嫌狐裘重漸喜絺縠單竭

來古清湘狂風捲濤瀾小市人寂寂夜深雪漫漫誰知
桂嶺北風雪如長安明朝過盤石仰見蒼蒼山上有千
尺松下有百丈灘劉子方避謗結茆寓其間却掃謝友
朋兒女俱團圓南行敢躊躇履險如驚湍我心本無慮
莫作拘囚看肯學老鍾儀楚奏聲嘶酸

伊洛節上人寓浯溪中宮寺作溪月亭諸人咸
賦詩輒留鄙句

結亭臨大江浯溪出其側道人傍溪月月照溪逾碧當

知月在天分身千百億此月有虧盈我心本澄寂合眼
聽溪聲開眼見溪色聲色兩不留我心何處覓夢覺月
在窻還如舊知識

次韻子忱游東山古風

休沐不暇懶趁此郊原晴駕言出東門蹀躞馬在垌江
山恣游眺頗愜幽人情同行有勝侶豪氣如陳登妙語
傾錦囊璀璨珠璣盈暫釋簿領勞頓覺心迹清人生一
世中轉徙如郵亭愛君絕塵姿坦坦心地平當年功名

念晚節師淵明出處豈有心敢論虧與成吾衰百念冷
端如在家僧東山本非山名字空崢嶸不見古松色詎
聞山鳥聲演師獨面壁燕坐朝黃庭骨冷喚不回蚌珠
祕龕燈

次韻元裕同游東山佳什東坡所謂愛此小天
竺即其地也

東坡謫竇荒夢想兩天竺哦詩寄東山妙響振林麓
作祠衛公旁一杯奠椒漿相望柳柳州追配韓潮陽

懷人空隕涕亭榭今荒墟溪山不改色松聲契真如嗟
余麋鹿姿慣逐漁樵伴平生鐵石腸那復置冰炭尋山
得佳侶聊遂幽人意登臨有遐矚俯仰觀此世君為丞
相孫仕作淵明清一枰可消憂五字堪析醒人生各有
役詩基豈妨道閉戶朝黃庭習氣終一掃

杜子固參議累覓南憲詩勉成鄙句子固謂杜
氏古無二族祁公其近屬也

長懷杜陵老遐想靖節翁二子不並世千載餘清風君

為南國秀志氣陵蒼穹盤屈不得伸妙畧參元戎歸來
侶漁樵香火陪琳宮卜居牛斗墟築室瓦礫中依然植
五柳髣髴餘四松南窻有幽意寄傲膝可容拊床寒月
侵曝背微陽通琴書樂忘憂尊中常不空吾鄉有諸杜
源流自祁公歸歟有成言葛巾永相從

季微季暉昆仲相繼見訪風姿議論皆慨然有
祖風季暉仍出佳篇見貽語極不凡且云即往
山中讀書作詩送行

吾鄉顧虎頭千里飛食肉名參慶厯賢罪入元祐錄堂
堂想儀刑凜凜見眉目百年議論定奇禍反為福森然
見諸孫刻勵如白屋我觀宣和間權倖互當軸一時名
家子半為閹宦辱暫時得富貴卑賤等厮僕君家賢伯
仲抗志守先躅幽情寄鉛槧雅尚在松竹僧房忍朝饑
雪牖耽夜讀訪我五松山懷袖粲珠玉嗟予久放浪歲
晚守窮獨閉門雀可羅三徑草常綠依山結衡茅一飯
共脫粟呼兒具

原本缺

山肴雜野蔌對案笑復蟬負我十

圍腹去去樂琴書山中芋魁熟

迎山閣為長慶寺登覽之勝暇日攜觴命友屢

醉其上因賦此詩

青山似幽人那肯入城府遠碧橫春空穠綠浮天宇常
苦俗物遮不得快觀觀何年敞層閣軒豁開牖戶千巖
勞顧揖萬壑隨仰俯飛騰若鵬鸞盤踞狀龍虎翩翩垂
翅翼蜿蜒回肘腋朝來拄笏看爽氣逼簷廡孤雲時去
來寒月靜吞吐溪山自奇絕信美真吾土我老賸得閒

遇勝輒為主朋簪俱莫逆
基酒屢清聚亦有支遁流時
來共揮塵迎客如迎山
好事免嘲侮常烹雨前茶不打
齋後鼓從今贊公房名字照千古

五月七日分韻得食苦筍詩

此君凌雲材節葉貫霜雪
千林富東南百種自區別
前後互萌芽一一調苦舌
貓頭效蟲鬼竹箭資瑣屑
世方嗜柔腴我獨甘苦節
幽姿照七筍挺特似英傑
定非淇園裁要是首陽蕞
侯門厭珍烹鼎俎雜葵蕨
安能知正

味但欲取客悅何當薦君槃茹香資激烈欲雪會稽恥
志氣在舖敵甲卒五千人猶能霸吳越

和胡江州丹陽道中二首

君才固英竒志在行天討胡為尚兀兀疲馬踏長道論
兵當節制摧敵如振槁不數圯上翁顧笑渭濱老凜然
擊搏手試用豈不早他年梁棟姿涵養已合抱

士卒常有餘食廩苦不足妻孥驚笑我陡換髯鬚綠江
西魚稻鄉升平氣全復以公封侯相自可飛食肉韜畧

固輻湊精神常滿腹去去復何憂驅除仍覆育

伯寓知府給事寵和子賤與僕域字韻詩格力超

絕輒復次韻

中原因干戈衣冠淪異域忠臣憤切骨義士血空滴平生憂國心豈以死生易年來返田廬門巷無輒迹老驥萬里心垂耳卧空樞素交今幾人十載勞夢役宣城擁朱轡潘子縛禪寂屹然障顙波我亦心匪石

和杜得之探梅之什

家山富梅林開落紛無數二年屏荒村踏遍溪頭路孤
標凜冰雪幽香襲巾屨陽坡照晨曦永夜泣月露端如
玉妃謫清絕欲誰顧歲寒偶相逢政復慰遲暮君看桃
杏面爭妍競深注何如叢棘中獲此秀傑句

寄題餘姚徐宰新作嚴公堂

子陵古真隱逸氣橫九州平生江海志自比巢與由鴻
飛本冥冥肯為稻粱謀虛屈萬乘顧枉煩物色求貽書
誚君房預作腰領憂舜江公邑里公去踰千秋青山無

古今大江日東流人物浪淘盡英名至今留當年漁釣
地陳迹餘荒丘徐侯有佳政百里安田疇作堂名嚴公
懷賢慕前修時來對江山一尊更獻酬我豈隱淪歟三
黜今白頭年來賸得閒忘機狎羣鷗結茅年湖傍一竿
幸可投蒻笠青蓑衣生涯寄扁舟嚴子定不死吾將從
之游

稚山運使作齋名藏暉且覓詩久不能成今茲
以大農召行有日因成鄙句并以送行

美玉當韞櫝明珠產深淵達士貴混俗大隱常居廬皓
皓終易汙嶢嶢難自全和光同其塵老聃有成言徐侯
如水鑑胷中定嫵妍疾惡若仇讎論事敢直前竭來大
江西獨攬刺舉權姦賊盡屏迹豺狼敢垂涎顧欲藏其
暉名室以自鐫老火正淫恣旱氣方接連悵別南浦亭
去去朝日邊中原正塗炭生民思息肩公歸明光奏輸
忠傾肺肝功成不自居名與日月懸

江西久旱徧禱莫應稚山少卿將赴行朝一夕

大雨遐邇霑足因成喜雨詩送行

老火擅炎夏枯旱氣欲然傷心早晚禾注目高下田民
窮捨耒耜羣起操戈鋌小偷何足道所憂在四邊夜來
滄江雨朝望水接天歡聲達四境渥澤遍大千清風亦
徐來扇簟皆可捐有懷林壑幽僧窻思晝眠流浪生死
海一往六十年何以報主恩粗了江西緣羨子朝上國
揚帆若登仙江山亦世情雨後清且妍悵別南浦亭杯
行莫流連去去聞好音一歲定九遷

某天資坦率人也性又剛褊偶以使事暫去行
闕馬上放目頗適野性作出郊一首簡知我者
出郊何所欣所欣在觀眺殷紅著新枝濃綠浮遠嶠悠
然出塵想快若追風驃幾年偈及懷兒女困嘲誚人生
貴適意官職豈不要從來坦率性痼疾難救瘳沈湎與
獨醒亦各以所好鶴脰自然長斷之定號呌譬如食茶
味煎煮人外料言行自有常安能改吾調浩歌歸去來
家有老德耀永託煙雲岑終焉擅漁釣

為向伯恭題

向公天下士慷慨有祖風亦復對行殿密議裨天聰君
臣意氣合每進嘗從容飄飄青雲志顧肯貪天功榮塗
拂衣歸安坐鄉林中作堂榜企䟽進退聊比蹤父老非
故鄉何必囊金空俗軌競奔馳世路方尚同善為子孫
謀但務田園豐偉哉此二子遐舉希冥鴻富貴如浮雲
聲名壓岱嵩千載繼者誰我友向伯恭

和劉提舉游龍井謁清獻辨才二像

我觀二大士超悟非適今過去與未來一一現此心緬
懷清獻公茲地舊所臨餘愛存甘棠過者猶斂襟平生
辨才老般若緣契深圖像儼如昔遺迹了可尋坐使茨
棘場化為薺蔔林法嗣傳衣燈膏肓存砭箴圓顱擁敗
褐華髮歌半簪相對了無言清標映孤岑丹青久剥落
感嘆成微吟了知身外身不坐喬木陰真形換綰素妙
句剗青琳與子成三賢清風迥蕭森凜然龍象姿不受
鼯鼠侵從茲香火社永為人天欽

謫居古藤病起禁鷄猪不食與兒子攻苦食淡
久之頗覺安健呂居仁書來傳道家胎息之術
因作食粥詩示孟博并寄德應侍郎

晨起一甌粥香粳粢如玉稀稠要得所進火寧過熟空
腸得軟暖和氣自滲漉過午一甌粥餅壘有餘粟淡薄
資薑鹽腥穢謝魚肉嶺南氣候惡永日值三伏外強幾
中乾那受外物觸兩餐莫過飽二粥可接續故人尺書
至教我禦瘴毒燕坐朝黃庭妙理端可矚神車御氣馬

晝夜更往復久久當自佳根深柯葉綠寄語陳太丘人
生真易足醉飽厭腥羶忽認海南叔

送孟博二首

我昔在閭里燕居處中堂兒女滿眼前嬉戲羅酒漿威
命忽臨門一物不得將回顧堂中人獨汝在我傍舟行
有蛟螭夜宿畏虎狼豈無平生交鄙遠多遁藏古藤底
處所敗驛無垣牆急雨挾風雷漏水夜沒床竹屋聞號
呼老兵凍欲僵郡僚誰復顧獨見李與黃

李中
黃元功時時

餽一嚮稍稍葦兩廊生意春欲回倒景照屋梁散步得
幽徑讀書有明憲僕夫浣我衣鄰娃縫汝裳晨庖鱸膾
美密室沉水香文字可消憂探索易老莊我唱汝輒和
不知歲月長葛洪隱岵嶠蒼梧真帝鄉汝歸固不惡淹
泊庸何傷作詩送汝行示汝鴻雁行

我少事遠遊出門如野鶴藩籬脫雞羣乘風縱寥廓一
往四十年平地起山嶽世緣真夢幻電過不可捉南來
幾萬里顧笑恍如昨昔如雲釋嶠今若龜脫殼竭來容江

上風物喜淳朴豈無鄉土戀浮念起即覺汝歸暫歡顏
所念路悠邈朝行避煙瘴夜宿傍城郭賸誇魚米賤勿
說風土惡頻送與笑迎但可付一喙

有嘉堂酒寄吳令

今晨有好懷薄日照窻牖幽人不可致誰共一杯酒鄰
翁有遠餉分寄中山友歡伯信可人麴生亦耐久豈比
從事君開緘化鳥有獨酌還徑醉千篇莫停手應思水
邊人竹屋雜蜚叟

簽判黃元功公廨枕江有小亭落成之初予偶
假居之明潔深穩因得游息其上榜曰寓亭并
留鄙句以見意

物生天壤間有形孰非寓心隨萬境轉飛走各依附
嶠南山河異歲月亦屢度新亭枕江臯杳渺可飛步風濤
振几席雲月隨杖屨吾生真寄耳那復歎淹駐當年有
離憂政以南北故舉足皆道場意適隨所過往參少林
禪歸指曹溪路去住吾何心要以生死喻遠迹混漁樵

忘機狎鷗鷺千載如知心相對猶旦暮

題李子從清風閣

吾宗河山傑氣直甘賤貧一坐古藤州十見巔嶠春深
林寄倦翼酒輟橫修鱗華閣俯大江東望山嶙峋一榻
自俯仰鼻息撼四隣稚兒日戲側艸妙參席珍人間正
熱惱道上多瘴塵清風颯然至自謂羲皇人願師陶靖
節不羨石季倫有酒但頻酌從渠喜還嗔

新亭

新亭結雲根暗谷通子午環山繚遠碧雲木巧相補峭
壁倚層霄痕迹無鑿斧朝登晡霽中嵐氣隨步武須臾
大明升萬象快觀覩一日一坐間變態難悉數松陰轉
虛簷清梵出重廡間閭萬瓦合下視纔一縷悠悠落日
吞耿耿寒月吐邀朋文字飲四座揮玉麈雅詩發天慳
妙語叩玄圃援琴奏哀彈得趣忘抑撫人生貴適意涉
世隨仰俯陋矣韓淮陰耻與噲等伍三年瞬息中聊作
溪山主杯深且樂聖綆短強汲古至理在目擊何用苦

撐拄超然心境空逸韻渺天宇

九月二日自公館遷居雙泉風物幽勝作雙泉
詩二十韻

山腰祕靈源初出纔一線方池湛空碧奔馳忽縈轉皎
皎涵青蘋纍纍湧珠串夜深耿落月澄澈靜如練呀然
舊穴深神物或時現邦人儻知敬早歲起雷電瓊山瀕
巨海鹵水充煎煉凜然居其間正味獨不變我來卜幽
居蕭灑得奇觀挹彼注兩泉澗溜忘分辨陶公豈虛言

掬飲逃禍難激齒冰雪寒晨起頻嗽嚥入腹清而列丹
田賴澆灌甘寒勝鍾乳精潔可羞薦靜無蛙蚓喧不受
泥滓澱惠泉入權門疲人走郵傳貪泉亦強名聞者自
鄙賤瓶罌日夜汲閭里悉周徧數椽如可老一壑吾欲
擅時時俯清泠照見本來面

九月二日徙居雙泉翌日徐自然使君李申之
監郡携酒見過退成古調百三十言戲簡二公
一笑

南行踰萬里公館煩造請主人憐老病為卜林廬靜郊
居偶然遂俗慮盡可屏雙泉信奇絕歲久渾泥濘稍覺
藻行繁漸已產蛙黽滌除賴衆力傾貲費修整幽竇響
珮環平地散林影潺潺來枕上客夢安得永邦人日夜
汲攜挈雜罌皿秋蔬灌百畦夏稻溉千頃端能滴冷泉
那復遜冰井蒼梧冰井元次山遺迹存焉使君屏歌吹政恐煞風景
我亦慣窮獨客至但煎茗

雙泉詩

有序

自然使君屢督雙泉詩顧東坡絕唱在前何
敢輕作今晨又辱佳章因次韻為謝

作詩媿才慳徒勤再三請一聆咸池奏頓覺哇淫靜惡
句如惡人浪出必遭屏君詩似澄江萬里無滓滓我詩
昧格律聒耳類鼃黽蘇公經行地亭宇稍葺整方池湛
寒碧曾照東坡影新詩與妙畫千載未為永不聞宗廟
器傍欲間瓦皿吾徒且加餐今古屈伸頃何如棄寸繩
要出千尺井蓬萊隔弱水未易凌倒景時能訪幽獨論

文具醪茗

九日登瓊臺再次前韻

異鄉感節物聊赴使君請層臺縹緲間野曠天宇靜木
落水涵空氛霧俱遠屏籬邊菊爛斑遠摘帶沙瀉誰云
鼓吹雄謾欲等鼃黽短髮不勝簪烏帽倩誰整衰顏強
追歡起舞羞顧影君憂白晝短我愛清夜永三盃意彌
勤散酒罄杯皿棄置身外事聊復樂俄頃世方洶波瀾
我心猶古井歸來豪興盡宴坐朝內景明朝汲新泉舊

篋餘賜茗

中秋謝彥恭惠酒

中秋有佳月名醞來海康海康太守賢憐我持空觴遠
分十具至呼兒喚鄰牆坐客盡飲流一舉空壘缸酒酣
對明月不藉燈燭光移席俯清流照我兩鬢霜海北與
海南各在天一方我老歸無期兩地遙相望宴坐枕榔
庵守此歲月長願子一吐嗟跨空結飛梁度此往來人
魚鹽變耕桑籬邊白衣來莫待菊葉黃

欽定四庫全書

莊簡集卷二

宋 李光 撰

五言古詩

和徐漕苦雨之什

澤國三月雨浩渺灌室廬爨調歸化工佞佛計已踈垂
時舞魴鱔快意鳬鷺起君來持龍節問俗浮江湖風濤
正逐蹙斯民豈寧居一飽不可期况乃供軍須素懷澄
清志慷慨時登車田疇得安業十郡通有無陰霾會消

釋清風為驅除漸聞閭里間歡聲變嗟吁

元夕陰雨孤城愁坐適魏十二介然書來言瓊
臺將然萬炬因以寄之

海濱遇元夕況值愁陰天重陰障佳月微雨雜瘴煙孤
城欲黃昏里巷已蕭然荒祠鼓坎坎老巫舞蹁跹揮杖
眩村氓捩齒傳神言異域俗尚鬼殊形耳垂肩邦人素
敬畏香燈競駢闐使君招我飲老病不得前有如伏櫬
馬碑兀難加鞭遥知瓊臺上萬炬照綺筵幽人正愁絕

跣趺坐深禪霧靄埋羣山不礙孤月圓茅菴一燈留照
我獨不眠夜闌香篆銷息息火自傳何當訪羽客同上

羅浮巔

羅浮山不甚穹而夜見日東坡有詩云羅浮見日雞一鳴又小說中杖大雷雨坐有道人引客

上羅浮頂月色皎然

雲雷皆在山脚下

丙寅重九權郡李申之置酒嚴氏野趣亭愛其

幽深因作此詩

遷流南海濱兩見菊蘂黃今晨有嘉招駕言陟崇岡負
郭得勝游幽居渺雲莊小亭椰葉間下有青蓮塘寒花

卧短籬疎松間修篁隔屋雞犬聲遠村散牛羊使君慕
幽貞愛此野趣長緬懷千載人聊復舉一觴西風起蕭
瑟吹我兩鬢霜旋駕豈無期良燕詎易忘

瓊惟水東林木幽茂予愛此三士所居雖無亭
館之勝而氣象清遠連日水漲隔絕悠然遐想

各成一詩目為城東三詠

今存
二首

南極多老人及見九代孫君生古崖州氣質清且溫今
年八十二頗覺行步奔白髮映紅頰疑是羲皇人城東

有幽居瀟洒真隱淪淵明寓栗里子美還羌村遷流到
雙泉得與君子隣仁里聖所擇德齒古所尊佳節近重
陽黃花已紛紛家家社酒香處處烹雞豚今朝風日好
水落依舊痕一散腰脚頑杖策時叩門

杜公
司法

我愛曾城居負郭頗幽雅田疇遠屋廬門逕絕車馬但
虞水侵門敢怨風飄瓦淵明非避俗自覺往來寡嗟予
屏斥久茲地猶里社相望十里間舟楫幸可假風休水
亦落晴日照郊野願言駕柴車始覺我憂寫

林曾
城

自然解印北還作古風送行

徐侯古循吏作牧海南邊三載撫民人擒縱出拘攣里
巷絕嗟呼囹圄無淹延父老有好詞不見吏索錢忽聞
解印綬蠻歌慘離筵遠控橫海鯨追躡凌波仙寄語廣
利神無令颶風顛臨行一麾手萬事盡棄捐勿作兒女
戀伊嗟涕潺湲火雲赤崢嶸修途願加鞭愛君氣猛厲
心似鐵石堅迥悟出世法痛掃習氣纏明窻淨几華
藏了大千別語徒諄諄維摩本無言

憶筍

會稽富竹萌窮腦鞭已抽我家南山南不羨萬戶侯暮
春杜鵑啼茁茁蓬麻稠冒土出羊角穿籬露貓頭紫
性陰冷荻芽體輕浮愛此凌雲姿不與凡卉儔勝韻貴
苦腴兒童悅甘柔爽口聊一快弱胃敢怨尤竭來海南
邦腥鹹厭蠻羞桃枝但叢生澀勒蔽道周遙看貌或似
美惡如薰猶安能助盤餐嘔嘔但棘喉唯有檳榔心羹
臠或暗投鄉味不可忘坐想空涎流人生各有適勿語

王子猷

去地草

丁卯四月望

城東古雙泉清駛給萬家耕墾晝夜給舶賈雜隣娃蠻
童與蜑女赤脚兩髻了常苦藻荇繁滋蔓掩白沙蕭疎
失林影聒聒鳴亂蛙十夫勇善沒入水初紛拏詎勞芥
鉞誅芟蕘費鋤杷除惡去根本無令再萌芽依憑絕纖
鱗驚懼失老蛇風吹有穀紋月照無纖瑕銅盆湛冰雪
石鼎發乳花餘波及農圃父老免嘆嗟

叙遊二十韻呈亭叔列之

戊辰三月晦端居倦煩促是時天久旱炎蒸劇三伏出門得幽尋佳處在東北二子俱可人皎皎瑩冰玉得趣

琴有絃對案食無肉

是日以丁亥斷屠

初彈醉翁操再鼓南風

曲琅然山水音一洗瘴霧毒陳園俯江郊茅茨擁修竹

造門慕子猷緩步效顏觸汲泉淪佳茗蕭散謝羈束清

華臨水岸下有萬荷綠

韋居所居亭名清華下臨荷池

披榛訪蕭子清

淨獨無欲黎沈熟瓦鼎溪蓀養石斛

石昌蒲非九節者皆溪蓀

杖藜

轉修徑夾道森喬木歸途遇馮姥斂袂不羞縮蕉花雜
山丹檳榔繞新屋欲我留姓名呼兒為磨墨似憐窮獨叟
曾忝十州牧良辰不易遇此會豈難續他時倘重來更
為呼醉禿

閩僧元伯本好飲
近乃折節痛戒

世以啄木為珍禽其聲至入樂府而海南一種
形小而聲淫每四五月間飛鳴如蛙蠲至八九
月乃已亦名啄木繁聲可惡然瓊人訛其聲為
罵禿禽殆得其實因為賦詩

南海四五月有鳥名啄木飛鳴亂葉間形眇聲繁促枝
間時瞥見黑啄羽毛綠雌雄相應和生哺依老穀或疑
在家僧受施不省讀為禽不知名但自罵禿禿小兵特
輕趨修竿每馳逐今晨耳目清桑下聞布穀黃鸝兩三
聲覲睨出幽谷從今屏菑翳遶舍植梧竹鳴鳳倘可期
樛枝要棲宿

居嶺外遇寒食

春日自明霽我心何鬱傷草木競芳菲飛鳴自頡頏悄

悄坐書幌幽幽宴空床既無功名念反思白晝長愁來
不自持零落鴻雁行三過解澤流六見槐柳黃最憐小
兒女路遠不得將生還一笑喜死去埋他鄉生死如循
環我師佛老莊感此寒食節新烟過隣牆松楸渺雲海
目極摧肝腸書成附鱗翼不如永相忘何以慰目前作
詩示阿張

仲兄去歲落一齒書來悵然作詩以寬其意

四大非我有元氣力護持齒從齟齬換既老還復隳太

公含兩齒卒為帝王師睢陽嚼空齧名與日月垂張儀
但舌在折齒激范睢漢相老無齒飲乳如嬰兒安得鐵
如意擊墮還離齒存固可喜齒落無深悲退之有成
言軟飯穩送之何須噬乾肺但可食肉糜養生已有堂
晏坐吞朝曦谷神定不死老聃豈吾欺時為五禽戲納
息如靈龜命友日飲醇弄孫且含飴齒落會復生千載
儻可期

八月七日夜對月

仲秋氣已爽林壑雨新過忽驚浮靄空乍覺天宇大夜
涼風露清佳月纔半破清輝漸可愛入戶驚照坐團團
遶中庭有似蟻循磨西山聳岡巒輪側愁易墮魏子不
解飲詩語頗頗挫呼兒聊與醖我唱渠輒和停杯看月
落客去未能卧海月夜夜好新詩幸頻課

庚午春予得罪再貶昌化瓊士餞送者皆悵然
有不忍別之意嚴君錫魏介然追路至僭耳茲
事當求之古人感歎成古風二首送行

紹興庚午春李子復南徙倉皇就長途夜擔不敢弛錢
我無雜賓亦有方外士裴杜二者哲矍鑠渾童稚老禪
不忍別握手揮涕淚行行至澄邁名姓難盡紀酒酣通
湖閣頗獲一笑喜緬懷雙泉居風土信清美牀頭掛海
月枕上聽流水夜碁招隱淪濁酒會隣里桑下不三宿
悵戀吾過矣人生隨遇樂已過猶脫屣最憐嚴與魏觸
熱到僭耳世情逐炎涼萬古同一軌對境心數役何以
敵生死南窻可寄傲散帙忽盈几松林十里間移植頗

易致赫日資繁陰且復宥老楮夜涼得深禪日永常晚
起恨君不少留伴我讀書史

寓多老藪方暑籍
其繁陰不忍伐去

海外謠

有序

瓊崖儋萬四州限在海外地里險遠輸賦科
徭率不以法所出沉香翠羽怪珍之物徵取
無藝百姓無所赴訴不勝其忿則相煽剽劫
歲在己巳盜起瓊山旁郡不稟約束第陰拱
以觀其變經畧司亟遣官弁將士且招且捕

凡踰時始以次殲滅明年春三月渠魁授首而紫羅諸村焚蕩一空雖足以懲戒後來然致寇之因實緣贓吏予懼叛民雖熄而贓吏愈熾因撫其起事之因作海外謠一篇庶幾採詩者達之諸司稍更舊法精擇廉吏使吾赤子咸被恩澤不甚幸歟

嗟爾海南民遭此贓吏阨銜冤無所訴相熾起為賊為賊計誠拙尚可活朝夕攝官陳建中貪猥最狼藉有女

攀勢要不料非偶匹但務房奩多芑苴又絡繹挾此恣貪恠如虎傳以翼貳車號按察往訴遭箠擊最後差丁夫欲免人十直貧民賣妻孥强者起持戟

陳集成緣此起

至今

文昌縣白晝無人迹其次經界官太守乃姻戚隨行縱

獄吏聲勢如霹靂

經界覆量官王琮郡差獄司雜職隨行

郡縣遭唾罵圖

冊成覆易

琮自雷取紙每幅定價七十圖冊已成者皆焚棄

三豪因衆怒從者

如葦棘去年從說諭閭里已帖息狂謀起賊吏從此復反側愚民本無知脅誘冒鋒鏑焚蕩玉石俱老弱轉溝

洩遺骸橫道路流血千里亦殺戮誠快意
賊吏有德色從今無忌憚徵斂幾時息
沉香與翠羽窮搜遠彈射烏衣徧村墟
氣斃已可炙久矣攝官契至此亦云極
祖宗有成法賊吏盍杖脊疲民正憔悴
使者宜憫惻輶車難數來時遣一幕職
永寬海外氓精求二千石世無採詩官
吾言徒感激

紹聖中蘇公內翰謫居儋耳嘗與軍使張中遊
黎氏園愛其水木之勝勸坐客釀錢作堂黎氏

名子雲因用揚雄故事名其堂曰載酒予始至
儋與瓊士魏安石杖策訪之退作二詩

何年老揚雄寄此十畝園年深草木荒杖策誰叩門
緬懷東坡老陳迹記舊痕空餘載酒堂往事孰與論
黃柑與丹荔不受瘴霧昏邦人時餽奠一笑空壘尊

東坡載酒堂二詩蓋用淵明始春懷古田舍韻
遂不見於後集予至儋始得真本因追和其韻
荒園草木深樵牧不敢踐雖無南國愛正以東坡免平

泉與金谷視此顏有覲至今儻耳民里巷多樂善勝遊
儻可繼杖策敢辭遠燕談有佳侶永日可忘返酒酣任
歌呼此興吾不淺

嗟彼南海郡土瘠士常貧諸芋餉畫耕松明照夜勤當
年兩黎老能邀玉堂人一往五十年遺迹宛若新邦君

時舉酒父老舉欣欣

通去城三里郡守勸農多會此堂

賢多隱農圃耦

耕可問津魯叟欲乘桴東坡願卜鄰

東坡贈黎詩云借君三畝地結茅為

鄰君他年青衿子凜凜多秀民

客有見饋溫劑云可壯元陽感而有作

世人服煖藥皆云壯元陽元陽本無虧藥石徒損傷人
生百歲期南北隨炎涼君看田野間父老多康强茅簷
弄兒孫春隴驅牛羊何曾識丹劑但喜秣黍香伊子十
年謫日聞貴人亡金丹不離口此妙常在傍真元日滲
漏滓穢留空腸四大忽分離一物不得將歌喉變哀音
舞衣換縑裳爐殘箭鏃砂篋餘鹿角霜吐哉此愚夫取
樂殊未央我有出世法亦知不死方禦寒須布帛欲飽

資稻梁床頭酒一壺膝上琴一張興來或揮手客至亦
舉觴滌硯臨清池抄書傍明窻日用但如斯便覺日月
長參苓性和平扶衰固難忘特藥恣聲色如人畜豺狼
此理甚明白吾言宜荒唐書為座右銘聊以砭世盲

食無肉

養生有真詮虛心實其腹十年嶺海游一鉢隨僧粥納息歸
丹田息在火亦伏黃河朝崑崙晝夜自回復空腸無滓穢氣
轉聲澆澆腥臙臙減吾壽厚味有腊毒顏回稱好學陋巷一

瓢足何侯日萬錢但取身後辱藿鹽有餘味何必常食肉

居無屋

處世若傳舍吾生聊託宿志士守蝸廬幽人卧空谷君
看漢梁董日享萬鍾祿華櫬庇千間子孫無託足海南
吾欲老是處堪卜築結庵傍松林開牖面修竹野老日
往來席地有幕局俯仰天地寬莫嘆居無屋

海南有五色雀土人呼為小鳳罕有見者蘇子
瞻謫居此郡紹聖庚辰冬再見之常作詩記其

事公實以是年北歸癸酉冬予亦兩見之今二年矣乙亥八月二十二日會客陳氏園飛鳴庭下回翔久之衆客驚嘆創見因賦是詩

海南有珍禽厥服具五色絳者為之長飛鳴隨止息佳哉陳氏園形制存古迹我遊秀野堂森木蔭華席羣飛為我來馴擾如夙昔鵲巢既遠遁烏鵲俱辟易邦人號小鳳隱見異凡翼姬公嘆不聞尼父未之識嗟予慙且愚疾惡不量力叱杞誚希烈流竄至南極神物知吾忠

天公憐我直吉凶有先兆告我將返北蘇公不吾欺流
詠冠今昔斯言儻有徵便可具接淅

不出

老氏不出牖莊生務內游猿猴猶習定雞犬放須收
仰超三際翱翔隘九州坐忘師正一辟穀慕留侯客至
酒三酌睡餘茶一甌蕭然方丈內卒歲更何求

五月十三日北歸雷化道中

謫居了無營羸得一味閒杜門十六年草深沒柴關猛

獸當路號虺蛇伏榛菅今茲果何年天誅此凶姦羣妖
既蕩除善類稍北遷仲子萬里來喜極涕淚潛坐定復
載笑喜我顏渥丹人生七十稀况復加九年平生學養
生吐納留真詮忘家何足道絕欲亦偶然歸歟謝世榮
收功在丹田宴坐息息勻頻嚙舌底泉日用形欲勞何
必驅小蠹看我鰓氣成空行躡飛仙

七言古詩

和胡德暉松軒詩

炎天羣木無葱蒼朝曦夕照繞屋梁一榻南窗復東廂
老松效技扶披猖微風颼颼弄笙簧坐變熱惱為清涼
簿書相仍愁肺腸細聲入夢我豈遑但覺風日明晴窗
皎如夜月和秋霜樛枝鱗皴龍蜃走翠葉鬱律鸞鳳翔
燧明徒誇能照夜坐想煙霧風中香何如軒成獨賦雲
錦章從茲遂愛夏日長會看壑聳仍霄昂

辛未人日同郡僚遊陳氏園

海南人日春已濃柳條遠映桃花紅攜觴尋伴逐春色

杖藜縱步遊城東陳園新築芳亭小綠竹猗猗自圍繞
杯行不用管絃催枝上綿蠻囀春鳥舊傳人日天多陰
今年人日春光好田家但喜諸芋収我輩惟憂酒樽少
明朝有興還復來賸買鹿蹄拼醉倒

樂會雷令數惠筍作詩為謝

朝餐敢歎庖無肉食罷時時自捫腹肯羨何侯日萬錢
不學天隨嘗祀菊傳聞樂會似淇園坐想猗猗千畝綠
邦人富比萬戶侯縣尹清廉仍不俗尺書遠致擬兼金

錦綳解縛排寒玉為君急食不敢餘恐被南風吹作竹
清湘道士潘靜素抱琴南來予方謫居遠屏郊
外如逃虛中每佳辰良夜風清月明對脩竹俯
清池必快作數弄如是幾年今將北還舊隱索
詩為別屢請而不解因歌而送之

道人南來冒炎酷雲水生涯寄枯木嗟予久墮魑魅羣
黎唱蠻歌耳根熟深林迴靜嘯鵲鷗雨濕天陰聞鬼哭
君來為我一揮手洗盡胸中塵萬斛伯牙師涓死已久

此聲欲絕君能續快彈初作鸞鳳鳴忽如啼鳥集華屋
吟猱抑按神氣閒流水涓涓赴幽谷夜深餘響應霜鐘
朝來吟對蕭蕭竹靜中最喜讀書聲妙響琅然振寒玉
要知心與古人會不務新奇誇俚俗浩歌別我出門去
潮回風便難追逐道人來時湘水渾道人歸去湘江綠
湘靈抱琴待君來月明莫向江頭宿

贈裴道人

癸酉昌
化軍作

道人今年七十六問我修行惟絕欲密裁澀勒當踈離旋

闢荒榛結茅屋不抄書不看讀宴坐凝然常瞑目夜深

頻嚙玉池泉晨起隨緣飽諸粥

海外惟昌化地瘠狹米資之泉廣土人以諸為

糧其大徑尺每斤不過一二錢故少饑民天以活此一方之人也

甘脆肥濃腐我腸可笑

蛾眉真鴆毒蠻煙瘴霧隘空虛謹守藥爐誰敢觸我愛

裴君道機熟過我玄談已超俗三峯頂上少人行百尺

竿頭防失足

三峯下街也

世人那識天地根往來綿綿無斷

續嗟予流轉海南村智者方明禍中福君不見龐道蘊

盡將活計沈湘江自織簾籬供口腹又不見成都市上

嚴君平終日垂簾唯賣卜王侯蝼蝥同丘壠學道從來
貴幽獨蚌生珠石含玉看我丹成跨鴻鵠馬蹄去去穩
着鞭關山路永多坑谷

成氏園

八月晦遊城西成氏園呈李子從并幕中諸
彥

泰和坊外成家園花木幽茂泉涓涓竹籬茅舍稱野逸
平坡細徑遙相連青松翠竹晚色淨紅蕉素槿秋爭鮮

卷二
幽禽頽樹蒙密古木夭矯藤交纏嗟予與子成二老
登山臨水追少年幕中羣彥盡豪俊小兒亦許依紅蓮
焚香隱几如逃禪一枰勝負聊欣然誰云嶺南瘴癘地
城西一壑吾欲專

四月十七夜觀月成詠

曉來新過雨天宇肅以涼橫空跨綵虹物被五色光夜
久羣動息月出東南方團團葉間露皎皎瓦上霜四月
未全熟清飈吹我裳新橋跨長堤下有百里江月色萬

古在江流自奔忙誰呼謫仙人被髮下大荒對月哦汝
詩臨流飲我觴夜景信奇絕茲游固難忘天地多變態
况乃魑魅鄉不如坐待赫日射屋梁妖禽孽狐都走藏

玄珠吟

予十年間重履憂患自藤而瓊自瓊而儋一
日忽悟笑曰此造物者知其頑礦難化故以
此苦之爾偶讀莊周書言黃帝遺玄珠而罔
象得之又讀維摩經云高原陸地不生蓮華

金匱要略卷二
因成玄珠吟適妙喜書來乃贈之

黃帝曾遊赤水北遺了玄珠無處覓我今偶到海南村
煩惱泥中親拾得珠體圓明光滴瀝流轉根塵人不識
只在尋常動用中未見爭知吾不失吁嗟世人空費力
欲見此珠須目擊要令心息每相依密密護持防六賊
可歎

金陵失守何忽忽敵兵燒我天子宫守臣頂香率父老
開門羅拜惟鞠躬翠華遙遙遁海道漢家詔令不得通

外交內應儔與鄴所在州縣皆望風坐觀豈但宣撫望
拜降亦有丞相充山巔水涯多白骨邇來十室九已空
權臣悍將恣吞噬剥膚椎髓方稱雄敵來擁兵保妻子
敵去奏捷希侯封城狐社鼠爭附會浙部復產劭與冲
紛紛餘子何足數我眎文舉真如龍

子猷知府給事寵寄道中阻雨之什憂時憫農
有古良二千石之風感歎次韻

老農麥熟還忍饑蠶婦見絲翻淚垂耕田辛苦竟何補

長安游手多輕肥良牧憂晴復憂雨咄咄書空應自語
皇天于物無偏頗不須怨嗟梅雨多

赤子既迫寒且饑異時嚴警如邊垂棄捐溝壑死鋒鏑
有如秦越視瘠肥公未隨車霈靈雨織婦耕農聞好語
愛民戢吏政不苛兵興敢避科徭多

坐忘吟

李季言以觀海圖詩見寄其言蓋寓養生之
意因作坐忘吟答之

我聞天台坐忘仙清虛石壁留真詮長生要妙止一篇
林間宴坐心超然壁觀無異達磨禪繫念一處離葛纏
真人祕語豈浪傳谷神玄牝常綿綿嚙津納息歸丹田
沂流直上朝泥丸下灌舌底生玉泉身輕超脫如蛻蟬
御風騎氣追倕仝神遊八極俯仰間度人濟物功行圓
要者白日見青天

短歌贈柯山祝道人

年來憂患老病纏獨寢一室方蕭然道人顧我笑且憐

贈以一粒金華丹彤霞入腹氣煥赫紫鰓照日光
編爛寸田溫溫起真火尾間歷歷朝泥丸道人
年少遊賢關曳裾躡履公卿間宣和天子崇神
僊近臣薦引登金鑾造膝一語開天顏羽衣縹
緲黃其冠吳筠雖嘗入禁掖稚川終隱羅浮山
荆棘掃盡黎衆熟禾鉞九轉龍虎蟠一裘百衲
聊卒歲斗酒滿引冰雪寒竭來鐔津施丹劑應
病與藥俱輕安度人濟世功行圓超脫滓穢猶
蛻蟬唐道士劉道合善鍊丹後尸解而去高宗
嘗奉天宮遷其殯室弟子開棺將改葬惟有空
皮而背上開圻若蟬

馬蛻

良弼使君寄梅花翌日曹憲仲約偶成長句

北歸已度梅花嶺洗盡瘴塵愁欲醒一枝何處最奇絕
鏡裏形容水中影西湖處士語已妙東坡先生句尤警
三篇自可追少陵一賦誰復傳宋璟老人新從海外歸
枕冷燈清愁夜永使君憐我老無伴折贈欲令娛晚境
夜寒相對默無言耿耿此心如古井主人皓首自能歌
倒載花前拚醕酎

飲茶歌

予性不嗜酒客至無早暮必設茶頃見中州
士友相戒不飲茶蓋信俗醫之說謂茶性冷
能銷鑠腎氣故好色者信之然當時貴人未
有長年者今恣情色慾而獨戒飲茶豈不謬
哉陶隱居云茶能輕身換骨黃石君服之仙
去雖未必然益知茶不能害人也作飲茶歌
以示同好者

朝來一飽萬事足鼻息齁齁眠正熟忽聞剝啄誰叩門
窻外蕭蕭風動竹起尋幽夢不可追旋破小團敲碎玉
山東石鈹海上來活火新泉候魚目湯多莫使雲脚散
激沸須令面如粥嗜好初傳陸羽經品流詳載君謨錄
輕身換骨有奇功一洗塵勞散昏俗

謝宗論茶云昏俗
塵勞一洗而盡

盧仝七盃喫不得我今日飲亦五六修仁土茗亦時須
格韻卑凡比奴僕客來清坐但飲茶壺源日鑄新且馥
炎方酷熱夏日長麴蘖薰人仍有毒古來飲流多喪身

竹林七子俱沉淪飲人以狂藥不如茶味真君不見古
語云欲知花乳清冷味須是眠雲卧石人

義柳廖翁贈予靈壽杖歌以謝之

柳山峩峩水濺濺清淑之氣鍾神仙山頭老木幾千年
不入樵斧隨飛烟廖翁好奇自掄選真材不用加雕鐫
鏗然入手龍脊瘦宛轉隨步鶴膝堅今晨過我有喜色
磨挐持贈誇奇特老人年來腰脚頑出入政藉扶持力
拄上岡頭望故鄉萬壑千巖纔咫尺天寒醉卧不出門

杖兮雖良長倚壁

載酒堂

東坡文章喧宇宙
粲如日星垂不朽
六一老人猶避路

作者紛紛皆束手

歐公見東坡文歎曰老夫當避路放他出一頭地也

俊逸精神

追李杜華妙雄豪配韓柳
晚年流落海南村
黎唱蠻謳

隨蜚叟先生已去五十年
遺墨殘篇尚多有
豐城寶劍

埋獄中光焰猶能射斗牛
敗垣壞壁秘蛸涎
夭矯龍蛇

已驚走

東坡真迹多為有刀者取去所存但摹本耳

獨餘黎氏舊園亭
喬木

森森免薪樵半是東坡親手植老幹樛枝互纏糾杖藜
乘興訪遺像遐想英風竚立久曾吹葱葉送迎翁當日

兒童今白首

子雲之子今六十餘矣東坡所謂小童即此人也

莫嗟寂寂路荒

蕪亦有幽人時載酒

欽定四庫全書

莊簡集卷三

宋 李光 撰

五言律詩

郊居雜興

竹舍臨寒浦柴門閉落暉潮回沙路淨月出野航歸風
勁砧聲急夜長更點稀子雲雖寂寞未覺草玄非

荷珠

荷珠圓復碎歌側動相關去似臨江失來如合浦還賈

人應誤喜蓮女想輕攀百斛傾梅雨天公豈是慳

觀穫

老農勤畚鍤歲暮閱星霜相見如遺秉安能助太倉晚
晴雞鶩喜薦食婦姑忙應有深村酒招邀隔短塙

贈林湘

先君師建學梅塢最交深共探先天易同哦正始音親
亡友亦盡人古道猶今子續通家好遺書幸細尋

九日登樓二首

久客驚秋意天涯思不窮三年猶北國萬里對西風時
序悲歌裏乾坤醉眼中黃花一樽酒千古此心同
木落秋容靜時平國勢雄望雲心自遠采菊興誰同詩
酒浮生過功名一笑空留連憑痛飲冠幘任高風

寄吳元預

出門懷抱惡別我去遊秦季子黃金盡潘郎白髮新一
評誰敵手五字愈驚人勉赴功名會如公定不貧

人日

人日靈川縣山深雪未融誰知桂嶺北宛似浙江東墟
市人煙合僧窻竹逕通杖藜閒信步日暮怯溪風

近傳已有代者補之作詩見寄因次其韻

清時民訟簡尺素半偷閒岐路將迎裏人情喜怒間
鳬隨意遠遼鶴自知還小艇春洲晚歸尋天姥山

馬上寄補之以急歸不果追前約為恨

歸鞍乘月夕度嶺訪靈真路轉山邀馬溪回水趁人春
殘花院靜家近夢歸頻回首追前約猶如未了因

贈高端禮

炎暑勞相過清言扇為停新吟捨瑟作衰耳洗竽聽諸
老子猶接正音今已零君家高記室句法是儀刑

同永嘉諸賢莫謁右丞許公少伊

葱鬱佳城祕回環宅兆深懸崖森翠栢踴地布黃金天
下方雲擾斯人竟陸沈塵侵徐孺榻絃斷伯牙琴

次韻師川見贈

釣樞歸雅望邪志寢姦雄鵬鴞清秋急豺狼當路空經

綸思妙手談辯想英風未厭東山卧沈機一局中

贈陳謙

識字嗟逢晚安貧未易招儒冠走江浙詩笥帶衢饒學
貴參先覺才須驗後凋諸賢書穩致定不作洪喬

人物有興廢山川無古今匹夫空有志四海孰知心莫
覩芝蘭室如游薜蘿林同行六七子弟淚各沾襟

次韻賀子忱喜雨

天眷周王德功歸傳說霖少寬邊餉急聊慰老農心雷

隱滄江轉階喧玉漏沈西山多爽氣拄笏助清吟

子忱告别忽改塗湖外迎護母夫人殯宮惻然
念之作詩送行

異縣傷孤殯慈顏念倚閭舊阡無觸鹿新薦有跳魚舟
楫踰江水風霜迫歲除歸來一大事莫忘剡溪居

德起侍講侍郎以親老丐外章累數十上上雖
察其誠至眷待方隆卒不許其去五月九日有
旨令歸覲且使迎奉以來一時士友莫不歆豔

稱歎為人臣子能使聖主敬愛貪戀如此誠千載之遇足以顯其父母揚名後世矣上虞李某作詩送行

別浦征帆速歸寧漢詔溫青雲方得路白髮笑迎門欲報慈親意難忘聖主恩朝回奉溫清忠孝兩能存

有懷念一兄三二弟

晚墮容江側蠻蜚且雜居懷兄頻有夢憶弟懶觀書憂國心徒切謀身計已踈歸田儻有日握手喜何如

城北江岸獨行成此詩居人皆竹籬茅屋無壁
可題歸而書於此

散策江村路柴門欲訪誰榕根盤古岸藤菜蔓踈籬未
辨遊春屐閒尋敵手碁天涯隨處好莫作楚囚悲

予始到瓊衆謂海南自來無大寒今歲臘月連
日風雨殆不異北地因成小詩記之

海國冬常燠陰霾忽滿山颼颼北風勁凜凜凍雲頑蟋
蟀已無語芭蕉猶強顏江頭梅柳色春色幾時還

丙寅十月二十二日孟堅理舊篋見純老送行
詩有見及語因次其韻

南來償宿債一笑悟前身白首癡頑老清朝放逐臣休
傳江左夢愁見海南春魯叟乘桴意他年莫問津
衣冠雙闕遠煙瘴百蠻深不記朝天路難忘拱極心任
從生死病莫問去來今身似孤雲遠閒飛不作霖
竄流今六載無復望天朝象魏闕云遠寶陀山匪遙音
書時有繼風義未全凋只有獼猴性年來亦漸調

八月十六夜江邊對月

水月交相映江空淨客衣孤光凌象緯倒影射窓扉宿
鳥依林動流螢逐暗飛興來隨杖履難下董生帷

連日以目疾不能躬課子侄輩枕上成四十言
粗明汲古之意以勉之

文史三冬足窺尋究始終夜窓捐末事歲計見深功古
井家家有靈泉處處通隨身具修綆取給自無窮

五言長律

近買扁舟蓬棹悉具戲示諸兒

此生雲水興今日買扁舟
著岸從人繫乘風逐處浮
山歌和漁子淨社結江鷗
夜泛寒潮穩朝尋古寺幽
謝安空雅量范蠡漫多謀
豈若吾無事平湖盡日留

瓊士黃與善會友堂課諸生作移竹詩為賦一首

綠竹名清友書齋植最宜
根深知舊壤葉密帶新枝
寒暑時須易冰霜操不移
影寒金瑣碎聲振玉參差
引鳳

符周運為龍待葛陂諸生頻掃徑琴海每相隨

洞酌亭詩

并序

舊傳雙泉相去咫尺而異味東坡先生易名
洞酌且作詩其上後稍稍增葺疏為三池今
茲五十年水益清駛然所謂雙泉乃混而為
一非知水味者莫能辨也東坡詩題不復存
紹興乙丑之春予再貶瓊山九月二日自行
館與仲子孟堅徙居之因訪尋舊題得洞酌

亭三字於鄉老朱景貺復揭之亭上居閒無
事因作古風二十韻意殊未盡復賦律詩一
篇以示太守徐自然別乘李申之

投老幾三黜郊居更一遷江山相映帶風物自清妍妙
墨移新榜清詩失舊鐫地偏無俗轍境勝賴前賢氣挾
岡巒潤榮滋草木鮮雙泉今莫辨異味豈虛傳餘潤分
畦圃支流給市廛幽嵌鏘玉佩石罅湧璣璵瀝瀝聞朝
汲淙琤攪夜眠甘寒通沆瀣精潔秘蜿蜒奔馳觀洄洑

泓渟有折旋滂沱蘓早歲清冷變炎天鴈過空遺影僧

來忽誤禪


二事見傳燈錄

澄瀾涵壁月暗谷響朱弦夢想千岩

秀徜徉一壑專使君常倒載別乘屢加籩隔竹聞茶臼
臨池泛酒船塵襟如可洗來此弄潺湲

三月三日康守燕嚴亭

楔飲城西路山翁岸幅巾習池還倒載曲水暗通津鼓
吹雄南國旌旗照暮春莫嫌娼妓拙自有主人真散策
花迷逕隨車雨洗塵杖藜歸興晚猶有浣紗人



欽定四庫全書

集部

莊簡集卷四

五

詳校官庶吉士

臣

翁樹培

侍讀臣孫球覆勘

謄錄監生

臣

吳殿英

謄錄監生

臣

嵇承羣

欽定四庫全書

莊簡集卷四

宋 李光 撰

七言律詩

吾里桃花之盛不減武陵獨東院一株色白而
多葉跗萼皆碧世謂之碧桃主僧回公折以相
贈置几硯間蕭然有出塵之想因賦鄙句

不作尋常好面皮

唐人有桃花面皮之語

劉郎去後弄粧遲喚回

濃睡春方好洗褪殘紅晚更宜
簷蔔有香陪冷豔醪醑

無力闕豐肌最憐月下朦朧影定起山僧莫皺眉

總持師示近詩一軸輒次最後神字韻梅花一

篇

水邊難覩似梅人且看垂垂一樹新獨許玉妃陪寂寞
可須青女助精神傳杯冷艷愁聞笛入戶幽香已報春
抽盡空花經月雨此心那復住根塵

重午食大麥

春來斗米欲逾千麥熟家家爨有煙手磨旋推雲子落

脚鐺深煮蚌胎員香聞並舍兒童喜效錄奇方胃海便
信是書生能說食杜陵饑客漫流涎

得之寓靜齋數學之暇不廢吟詠甚自得也因
其歸省作詩送行

數椽茅屋絕過從窻戶深明一逕通雨過竹叢增晚翠
風翻荷沼亂殷紅揩磨五字無瑕類鼓吹羣經有折衷
數學從來自強半應憐時輩尚談空

贈李振祖

兒時思致早飄然便合高騫在少年下第令人感二鳥
上庠寄徑應三鱣義方永訣詩無恙手澤珍藏墨尚鮮
識取前修顯揚事決科之外有流傳

向丞廳舊有小軒榜曰日哦庠隘不爽近徹牆
向南植竹數竿改曰分翠與僚友邑之賢彥日
遊其間且索鄙句因賦二詩呈諸友

旋植修篁一逕深蕭然便可滌塵襟碧移湘浦千梢淨
清借淇園十畝陰曉檻秋聲風撼玉空庭寒影月篩金

造門賴有山陰客酒熟時來伴醉吟

先生活計未全貧一徑簷簷碧玉新野趣近依陶令宅
幽姿深隔庾公塵獨餘世外冰霜操不逐人間草木春
吏隱何妨成小築風流重見竹林人

題向丞竹軒

琅玕新植覺深幽頓使軒窗一夜秋寒影靜侵書幌冷
翠陰清逐桂花浮蕙蘭終許依霜操桃李從教媚冶遊
公子已多林下趣更看仙吏落銀鈎

詩悼德興通判寺丞

扁舟訪我海邊村笑語俄驚隔九原蕭寺新題雲有態

德興訪別日嘗留題於姜山詩語頗工

故鄉清譽玉無痕傷心姪女能傳

業銜痛慈親尚倚門糾紉情乖臨穴送一尊聊酹若教

魂

德興無子

題藏春軒

何必金丹訪洞賓壺中日月自長春直疑簾幕遮藏得
未怕鶯花漏洩頻摩詰神通移不去桃園風景畫難真

尊壘賸把笙歌擁
沉醉何妨墊角巾

送知府提舉出守號畧

繡斧當年舊使星
却分符竹往專城
流風遠繼三堂詠
扶路爭看五馬迎
不獨循良追漢吏
便應清切振家聲
都門祖帳人多羨
嫋嫋春風動旆旌

次韻叔興計議端午發家書感懷之詩

細葛香羅罷賜衣
十年風雨暗蝸廬
浴蘭紉佩憐兒女
懸艾題符徇井閭
地勝斗墟饒賦詠
日長蓮幕少文書

欲憑尺素傳深意千里慙慙附鴈魚

贈趙璠夫

世間兒子總紛紛屬籍吾賢最不羣
天在山中須畜學風行水上自成文
操存有約要真見記問夸多只謾聞
我與東巖情分腆臨分書此勉郎君

游破山通幽軒用前人韻呈同行諸友

小軒佳致信通幽爽氣侵人挾九秋
暇日不妨尋舊隱清時無用借前籌
能詩誰復追常建愛竹吾今似子猷

已有琴書隨杖履更邀閒客伴清游

題無俗亭

一榻蕭然岸幅巾寒梅為友竹為隣清譚謝傅風流勝
倒載山翁氣味真獨把琴棋消永日未須歌管送餘春
簿書堆案應頻掃不學陶潛避俗塵

一云心地常
無一點塵

人日立春呈元成進道二兄

人日春風動琯灰新年佳節併相催金花巧向釵頭見
和氣潛隨斗柄回青入池塘頻夢草暖生官閣易尋梅

相從便好攜爐鉋乳面新來勝撇醅

新詩如律起寒灰多謝鄒郎着意催清比金莖天上落
句生春草夢中回才高可但空吟雪心鐵猶能強賦梅
山月欲圓人又好羨君同潑甕頭醅

校文毗陵經由見寄

牽衣兒女最相關節物催人歲欲闌船落草聲驚夢斷
水涵山影照杯殘堂深空羨河陽集被冷誰憐范叔寒
坐想歸途花正好杜鵑聲裏破愁顏

度黃陂嶺

肩輿渺渺歷崎嶇自笑謀身老更迂
獻策但知憂社稷投荒那敢顧妻孥
南行已度黃陂嶺北去何愁青草湖
冒雨穿雲信奇絕茲遊真豈是良圖

次郊行韻

森森巨麓蔽秋岡薄日籠陰一味涼
散策繞溪聞覓伴幅巾對客坐焚香
午潮暗長看平岸野竹纔添便出牆
巖壑自無南北異不妨隨處得相羊

某近復得女補之有詩次韻為謝

荆棘林中蛇虺驚懸知不作鳳雛鳴維熊已誤傳佳夢
得女猶能繼頌聲貧賤預求梁氏壻才情敢擅謝娘名
囊中幸自全無物更覺新來分外清

諺謂盜不過五女之門今幾半矣

和胡德暉增明軒詩

憲間列岫鬱嵯峨一寸遙岑已是多跨海空青疊寒玉
浮天濃綠豔修蛾漫傳五嶽歸圖畫坐想千巖見詠歌
從此閉門閒覓句直將世事付依阿

次韻補之續思越吟

俗軌紛紛正背馳，鑑中白髮愧明時。
致身何必營三窟，入仕聊同庇一枝。
故里有懷松菊老，聖朝無用計謀奇。
相從喜有忘形侶，杖屨山樊酒滿巵。

奉和補之至日書懷

薄宦伶俜祇自傷，捧卮無復獻華堂。
暗驚老去蒼顏在，誰道陰鋪白晝長。
天際雲煙成五色，堯階鴛鴦列千行。
懸知凍筆孤吟罷，徙倚南窓揖翠浪。

次韻七夕

犢鼻長挑竹杖頭未能免俗想清流西來誰遣青禽至
僂去還乘白鶴遊天上歡娛纔瞬息人間恩愛漫綢繆
穿針乞巧真兒戲曝腹庭中更可羞

又德循補之寵示七夕酬唱聊發狂言以當一
笑

好事多應與願違經年消息却如期忽忽舊約重尋處
耿耿銀河欲渡時綽約肌膚雲路遠低迷簾幕玉鈎垂

夜涼風露非塵世天外彎彎墮月眉

補之以鍊養之說勉德循眷眷之意并見二詩
若懼其不我從者以待德循可也他人能無謂
乎因次韻奉寄

漫道壺中別有春枉教衆楚笑齊人本來妙說元無說
信是靈真未識真佩劍攜書如可繼殺雞炊黍不妨頻
相逢且說無生話若問長生有大鈞

不用休糧學隱淪眼前無事即仙人解官終作陶元亮

晦迹聊同鄭子真交友盡緣酬唱密關山豈碍往來頻
流行坎止平生志壽夭還如泥在鈞

客醉而亟歸不慮畏塗之可戒當為罪首丞令
不行與吏慢丞命其罪均也以為不然則縣令
先入又何逃焉因次韻戲答德循且誚深山道
人眷眷炬火非胥靡登危而不慄者遂并以寄
之

肩輿歸去未全醒倚戶何人念遠征事在赦前皆可罪

過因酒後各原情壺中未便乘風去夜半何妨祕息行
不向險中求不死却因何處覓長生

次韻補之瑤堂瑞蓮

映水雙開帶晚烟丹葩浥露闌鮮妍瑤堂地產金蓮瑞
蒿里人歸玉府仙並立江臯珠珮冷相親漢苑曉粧偏
舜庭敷奏無虛日潛德并遺柱史傳

和睡起飲茶

虛堂清簟午拋簪人靜踈簾映晝闌身過中年心已倦

病因煩暑氣常昏紫煙碧月初賜乳竇寒泉世莫論
塵味暫忘惟嗜此更無餘思到芳樽

贈高申

夜半匆匆離府庠那知造物相槐忙直言賈禍翻成福
正論驚人竟擅場

景文論策
甚持正論

庚戌掄魁卿有技甲辰近

榜士流芳勉旃學問全名節富貴儻來如探囊

送韋子駿赴中書舍人召

桃李成蹊竹逕幽幾年依隱玩林丘日邊紫詔頻催入

郭外青山故挽留，河右始知天子聖。
淮南應寢叛臣謀，絲綸世掌真餘事。
濟難徐觀用巨舟。

賊退雙溪樓遣興

是時方力辭名命

朝來喜見妖氛靜，坐覺山川勝氣還。
關塞罷征車，馬健郊原得雨老。
龍閒黃綿慣擁茅簷，日白髮羞陪玉筍。
班好在故園，兵火後那無破屋兩三間。

八月晦日游東山彥約有詩次韻為謝

永夜金莖下九天，郊垌風物正淒然。
百年寶地空蕭瑟。

十里青山水接連局上笑談甚易勝坐中奇險句難聯
定回老演應相問淨社何時到白蓮

燕坐僧窻藝水沈暫時塵務不關心殿堂突兀諸天擁
花木扶疎曲徑深節近重陽堪把翫景如圖畫費摹臨
秋晴急趁黃花約短日淒風易作霖

辛亥中春遂宮祠之請自漁浦轉山入離渚宿
化城以歸道中成鄙句

誰倩冰霜一掃空旋烘和氣轉春風野田溢水層層落

山路催花樹樹紅
門巷旋教開竹筵
姓名初喜掛琳宮
江湖乍脫風波地
莫擬扁舟伴釣翁

獨宿有懷

危亭搔首撥寒灰
夜久無人共一杯
濕翠沾雲溪外竹
暗香浮月壠頭梅
烏啼日落孤村晚
被冷燈青夜夢回
還許對床尋舊約
肩輿應為我重來

次韻幕僚喜雨詩卷

皇天欲遣雨催詩
潤澤焦枯自應期
江上半犁如有繼

田家一飽豈無時漢軍乏食徵方急商后精祈事敢遺
湯以六事自責嘉穀蒿萊俱茂遂故應沛澤稱平施

題塵外堂

故園重到豁塵襟桃李成蹊竹塢深三徑頻來無俗客
五更喚起有鳴禽溪光山影常遮眼酒醖茶甌獨掛心
塵外莫言無一事苔痕掃盡復相侵

歸五松有作呈陳志尹諸兄

幾年辛苦厭兵間多謝君恩肯放還故里蕭騷松竹在

流年荏苒鬢毛斑愁多不分青春過睡足聊欣白晝閒

況有弟兄同保社年年攜酒共澆山

北人以上墳為澆山

復用前韻簡志尹

已謀湖上屋三間身退聊同倦鳥還老去最便青筇笠

夢回空想紫宸班

班班字詩人多通押東坡和程正輔詩云助我金鼎光爛班再和云他年

許綬達萊班

招邀山月當軒醉結約江鷗作伴閒賴有淵明

能賦詠悠然把酒對南山

和孚兄兄安貧樂道以書史自娛嘉歎成詠

青山繞屋水侵籬拙計何妨與世違
牕有殘燈供夜讀
瓶無儲粟補朝饑日長門巷荆枝合
歲暮風霜塞鴈歸
白首重來耆舊盡餘年從此永相依

次韻孚先兄寵示汲古佳章

甕牖蓬牕守素風弟兄來往一生中
祇憑六籍為修綆
豈有雙梁架綵虹朝市山林非有異
衆生心佛本來同
誰知白首維摩老萬事都將衲被蒙

今歲遇元夕于五松連日大雪巷陌蕭然孚先

兄有詩詫燈火之盛因成四韻

里巷蕭條戶半扃更無冷月掛山城
熒熒小市唯漁火耿耿幽牕但雪聲
海國此時瞻氣象端門何日覩升平
會須一掃陰霾盡盡放冰輪徹夜明

孚先兄以連雨形于詠歌是時適聞韓侯淮北
之捷因次韻

頽垣敗屋未須悲淮北于今暗鐵衣
背水漢營朝氣銳青岡敵騎夜聲微
蕭條里巷徵符急浩渺江湖羽檄稀

不及戎行親矢石獨將詩禮繼庭闈

伏覩親征榜又聞韓侯過江北是皆可喜然小
臣區區亦有不勝憂者輒次韻成鄙句呈子駿
侍郎

親征一紙詔書頒頓覺中原氣象還漫說風沙臨瀚海
遙憐草木舊淮山百年社稷傾危後一擲乾坤勝負間
北望鑾輿心共折小臣無路得追攀

和孚先兄久雨

未容春色到園林寂寞鶯花困
久陰積潦壞墻低易補
曉寒侵被破難禁門閒賸欲償詩債
裘敝猶堪當酒金
昨夜東風掃羣翳放迴天地發生心

甲寅仲秋水漲獨民先兄元發弟徙居招提日
有登覽慕酒之勝連日雨復大作水且洊至舉
室幾于濕浸仰二公之曠達歎輜重之為累輒
成鄙句以寄并呈志尹宣教表兄洎往來諸友
兄一笑

活計從來祇旋營急難方悟此生輕資身但有書盈腹
潤屋不將金滿籬塵榻曉寒資酒力空堦夜雨雜暮聲
茗甌時赴湯休約肯念人間雨與晴

喜晴

西風一夜卷層波并落人聲喜氣多巨浸漲天吞夢澤
空庭積水湛星河光搖萬瓦疑浮動翠颭羣山巧琢磨
從此江湖更清曠肯將軒冕換漁蓑

賦長慶寺白桃花

似與江梅欲抗衡
空庭初見數枝橫
素肌臨水瓊琚冷
落葉沾苔絮雪輕
玉體生來清自韻
冰魂別後夢難成
故應天遣娛春晚
一洗人間紫與頰

三月十一日獨寓經閣
民先元發商叟見過縱
步長廊因至旼師房
愛其潔雅攜碁淪茗
竟日而歸因成鄙句

長廊散步尋僧話
青眼相邀得老旼
久禮懺堂心獨苦
慣迎野客語尤真
當軒翠竹根根靜
對手拈碁局局新

日暮循隄還舊隱一栢那復較醺醇

晚晴

宿雲解駁遠峯青谷鳥驚呼報午晴屋冷籬疎茅店迴
路平沙軟筍輿輕行窮坡嶺山方好捲盡旌旗眼更明
慷慨未須關世務宵懷得酒暫能平

贈池元堅

去國曾聞首扣閤今聆議論汗漿翻忠忱我愧西都向
行誼君賢太學著薜水門開趨輦路黃封囊奏乞神幡

英風義槩幾成俗涵養都由聖主恩

常丞若問老庸齋屋借湖光一鏡開
執卷多應鵠袍至載醪無復繡衣來
漁樵賸喜皆予伍鷗鷺相忘不我猜
翰長鄰居清健甚時時賡唱亦奇哉

孤坐有懷

燭底黃花伴獨醒小牕寒月半櫳明
滿添宿火留香霧重理殘杯漬落英
老驥自能尋舊轡偏師暫喜解長城
獨餘惠遠秋蓮社懷抱時時得再傾

遽庵道人寄和重九感懷詩五章語皆超勝意
無釋老輒次其韻

百歲光陰日半斜因緣已透更何嗟飽參禪窟傳心印
一見桃溪悟落花了得頓門方自在修持徑路斷無差
世人學道徒勤苦終日蒸炊只是沙

次曾敦史會秀野詩韻

握手相逢醉別筵興酣真是飲中仙一枰聊欲觀成敗
三盞何勞辨聖賢老去不傳巫峽夢夜來頻燕玉池泉

鑑湖自昔多清賞
結約芒鞋上釣船

閒地逢君懷抱開
攜壺選勝得同來
青山滿眼空排闥
紅袖何人為舉杯
四面軒窗供眺望
一時簪履許參陪
黃昏渺渺溪橋路
燈火微明恨獨回

厲安行結小庵湖山之間
破竹激水甚自適
杜得之作詩因次其韻

不慕軒裳慕隱淪
直將富貴比浮雲
竹溝引水通銀漢
石甃澄瀾起縠紋
湖上三間容我卜
溪邊一派與君分

枕流漱石平生事黜陟從今了不聞

比見客談東福昌之勝若可避世恨未能一遊

偶杜某

謂得之

出諸公宿雲庵詩軸戲題其後

聞道招提枕半岡結茅真在白雲鄉嵐光滴瀝衣裳冷
爽氣空濛枕簟涼幻滅不傳神女夢心清時到贊公房
是身直與雲相似肯與衆生出岫忙

不出示鄰士

予自入夏多徜徉逃暑中秋後乍涼杜門却

掃求古聖賢於殘編斷簡中漸覺有味喜而
成詩

小窻秋半日暉暉蠹簡陳編漸可窺晨起已空摩詰室
晚涼深下董生帷參差紅影蕉臨水散漫寒香菊遶籬
從此杖藜休引步習池花草任離披

與得之手談約不勝者賦詩探題得題屬吉老
所居得之當作予和之云

聞道全家避亂離數間茅屋畏人知閒尋倦鳥安巢處

靜看孤雲出岫時
甕釀濁醪緣好客
棊翻妙著待羸詩
從來谷口稱真隱
應笑通衢賣卜醫

陳氏園亭

亭今屬霽明年來稍加葺
治面山臨水松竹蕭
然暇時常從諸鄉友
杖策來遊徘徊竟日因
以宴喜名其堂杜得之賦
詩因次其韻并呈
常往來諸友

花逕微通竹逕幽
暮年清賞在林丘
登臨未覺三山隔

俯仰常隨萬壑流，樂土自應多樂事。
閒身居此得閒遊，酒杯碁局平生事。
莫把枯腸數攪搜。

遊智林寺

扁舟來訪小叢林，花木通幽院落深。
旋拂繩床成午夢，閒持貝葉動秋吟。
竹聲瑟瑟生虛籟，山意戔戔入素琴。
更喜老網能會事，手携鑪鉞自相尋。

獨宿報恩寺次韻

竹枝桐葉滿秋霜，愁倚欄干望草堂。
過澗歇時芳草渡，

遶池遊處芰荷香應思佳客傷情遠欲訴衷情促拍忙
好是山亭宴僚友夜深紅燭映天長

幹譽舍人將赴召前一日錄示左丞公昔年見
寄佳什輒用韻奉送

不用移文託北山須公一出濟時艱飛鳧自欲朝天闕
老驥終思入帝閑直使姦諛俱落膽要令凋瘵變驩顏
雲川之民困於月糴軍儲廟堂雖深知其弊未聞有所
蠲減公久間親被其害又日來米斗千錢拯救焚溺莫
急於
此中興事業須耆傑炯炯何妨兩鬢斑

陰崖結屋全家隱世路風波任險艱白首嗟予三黜慣
青山羨子十年閒時危莫忘頻攀檻主聖何妨數犯顏
賈誼歸來定前席金鑾玉簡綴清班

世綵堂

耕桑不擾罷開邊家國安榮二百年三世綵衣疑有種
一門忠孝豈無傳遭時自致公卿貴積慶多因父祖賢
鶴骨松標長照世不須圖畫上凌烟

送張子猷給事帥福唐

五馬東來隘里閭，旌旗照海奉安輿。
時危未暇寬徭役，歲歉無勞進羨餘。
赤子弄兵先解散，烏衣侮法費驅除。
兵戈滿眼瞻王室，郵傳時時附諫書。

十二月二十五日詩悼傅子駿給事

歸尋北海橋邊路，慟哭斯人但故廬。
三徑空存陶令菊，萬籤難見鄴侯書。
丹青寫照空留影，慷慨論文孰起予。
歎息平生英妙氣，只今寂寞契真如。

悼陸公彥常右司

蘊藉風流絕世稀
妙年詞賦邁雲機
漢庭留滯馮唐老
越國雍容賀監歸
方喜鏘金翔禁闥
忽驚埋玉掩泉扉
傷心里巷從游地
獨對秋風淚濕衣

送廖用中侍郎知漳州

羨君忠孝兩無虧
出處雍容自造微
供帳都門疏受去
懷章郡邸買臣歸
君恩已荷全家飽
治績行看百姓肥
回首文昌舊游地
相從漸覺故人稀

自天姥入石橋路雖險絕而氣象殊勝殆非人

境予將還禮方廣諸尊者偶成鄙句

曉入天台訪石梁
縈紆嶺路遠羊腸
溪田溢水層層落
巖壑經秋步步涼
花乳散甌爭供茗
瑞光騰彩競拈香
心知未是真消息
方丈蓬壺共渺茫

亨仲察判赴召以重陽日酌酒夢草堂賦詩送
行

夢草池邊一笑同
冥冥雲迹羨飛鴻
青山不屬紅蓮客
黃菊羞簪白髮翁
直使淮南叛謀寢
未妨冀北馬羣空

中興事業須公等勿憚危言達聖聰

遠蒙宮使密學侍郎寵示和章謹再用韻寄呈

疇昔心親迹異同端如社燕與秋鴻關河此日歸真主

巖壑他年屬兩翁老去熟知交友態憂來頓悟世緣空

傳聞敵騎謀深入好為提兵勦勒聰

公詩及前書有避地永嘉之語故以

勉之

和戴禹功游水雲館

舉目江山有異同笑談尊俎恨匆匆雲烟杳靄長淮隔

花木扶疎曲逕通間伴鳬鷗浮野水未隨鷹隼擊秋空
會當雪後尋君去不學子猷清興終

送禹功還錫山

羽書烽火迫防秋努力聊寬聖主憂契濶友生多散落
急難兄弟自相求

近以書寓機
宜辟兄長

歸歟便可追吳隱相對

安能效楚囚從此音塵渺江海相思時上庾公樓

九日會南樓坐客十有二人以人世難逢開口

笑菊花須插滿頭歸分韻得歸字

不用攜壺上翠微
南樓風景古云稀
寧辭坐上吹烏帽
應笑籬邊候白衣
舉目佳山傷客意
滿園叢菊待人歸
分題未盡賓僚數
更看紋楸小合圍

餘須滿兩字子忱
彥約輸碁得之

次韻子忱郎中九日南樓宴集

登樓把酒面孱顏
富貴功名了不關
千古池臺悲帝子
一時賓幕陋龍山
影沈寒水鴈聲斷
香抱秋花蝶意閒
八郡往來聊自哂
孤雲出岫尚知還

達明宮使右丞寵寄新詩輒次韻為謝

吏役無因棹酒船一杯蕭寺破茶煙文章雅健追前輩
交舊凋零感暮年聞道巖廊勤注想豈容琳館久回旋
好風吹寄凌雲句無數珠璣墮我前

衰白相逢贛水邊十年存沒竟誰賢別來舊隱荒三徑
醉後高談驚四筵晚節功名君未免半生憂患我堪憐
秋風久負蓴鱸約歸夢時時到剡川

宮使少卿作喜雨詩予輒續貂然連日烝鬱雨
意殊未解雪川地瀕太湖畏雨而喜旱亦有足

憂者輒再和賀子忱韻并呈少卿公一笑

老鈍安能濟中興知君此意每推誠邦人雖喜天心格
農夫預憂禾耳生秋後竹陰侵簾冷夢回蛩響雜堦聲
雨溪自昔傳佳詠雲水相依夜自明

次韻劉仲臯少卿喜雨

漢詔寬慈下玉京人心天意格精誠初欣父老扶攜聽
忽看風雲洶湧生千里沾濡隨渥澤萬家愁嘆變歡聲
南樓夜色晴方好與子賡歌待月明

富陽道中懷劉希顏兼得道任書寄二公

渺渺平蕪雪正晴
旋驅征騎出郊坰
越山似我頭全白
江柳如君眼欲青
有信梅花傳驛使
忘機鷗鳥戀沙汀
洞霄結約香燈社
便欲相從老翠屏